

Na osnovu Programa utroška sredstava „Transferi za podsticaj razvoja, poduzetništva i obrta“ na koji je Skupština Bosansko-podrinjskog kantona Goražde dala saglasnost svojom Odlukom broj:01-14-468/09 od 19.05.2009. godine, Ministar za privredu Bosansko-podrinjskog kantona Goražde, d o n o s i:

P R A V I L N I K

o izvorima sredstava, uslovima, načinu i postupku dodjele sredstava po Programu „Transferi za podsticaj razvoja, poduzetništva i obrta za 2009. godinu“ sa uputstvom o radu komisije

Član 1.

Ovim Pravilnikom utvrđuju se izvori sredstava, uslovi, način i postupak dodjele sredstava po Programu „Transferi za podsticaj razvoja, poduzetništva i obrta“ za 2009.godinu (u daljem tekstu: Program), uputstvo o radu Komisije za dodjelu sredstava, organi i tijela za provođenje Programa, kao i način implementacije i utroška sredstava, te kontrola i mjere namjenskog utroška sredstava, kao i druga pitanja.

Član 2.

Za realizaciju Programa iz člana 1. ovog Pravilnika koristiće se sredstva utvrđena u Budžetu Bosansko-podrinjskog kantona na ekonomskom kodu Ministarstva za privredu Bosansko-podrinjskog kantona Goražde 614900-Transferi za podsticaj razvoja, poduzetništva i obrta za 2009.godinu u ukupnom iznosu od 80.000,00 KM koja će se dodijeliti putem Javnog poziva.

Član 3

Pravo na dodjelu sredstava iz predhodnog člana imaju poduzetnici i obrtnici registrovani u skladu sa Zakonom o podsticaju razvoja male privrede i Zakonom o privrednim društvima kao i udruženja poduzetnika i obrtnika, Obrtnička komora, stare tradicionalne zanatlije sa sjedištem na području Bosansko-podrinjskog kantona Goražde, i to u sljedeće svrhe:

- podrška za zapošljavanje;
- povećanje broja registrovanih obrtnika;
- povećanje uposlenosti, rast i opstojnost;
- očuvanje postojećeg biznisa;
- podrška niskoakumulativnim i deficitarnim djelatnostima;
- očuvanje tradicije u porodičnom biznisu;
- povećanje uposlenosti mladih i žena;
- promocija i javno predstavljanje naučnih i praktičnih dostignuća (inovatorstvo);
- očuvanje tradicionalnih esnafskih zanata;
- modernizacija obrtništva i usluga;
- podrška Obrtničkoj komori Bosansko-podrinjskog kantona Goražde u cilju funkcionisanja, tehničkog i kadrovskog osposobljavanja.;

Član 4.

Kao korisnici ovih sredstava, mogu biti poduzetnici i obrtnici, udruženja obrtnika, Obrtnička komora i stare tradicionalne zanatlije pod sljedećim uslovima:

- da su registrovani na području Bosansko-podrinjskog kantona Goražde u skladu sa Zakonom;
- da se obrt i poduzetništvo obavljaju kao osnovna djelatnost i da kod aplikanta nije utvrđen trajni prestanak obavljanja obrtničke djelatnosti;
- da su članovi obrtničke komore i da redovno izmiruju obavezne članarine;
- da su im uposlenici u stalnom radnom odnosu;
- da su do sada opravdali i namjenski utrošili sredstva dodijeljena od strane Bosansko-podrinjskog kantona Goražde;

Član 5.

Sredstva utvrđena u članu 2. ovog Pravilnika u iznosu od 80.000,00 KM će se dodijeljivati po osnovu Javnog poziva koji objavljuje Ministarstvo za privredu Bosansko-podrinjskog kantona Goražde. Javni poziv će biti otvoren najmanje 15 dana i isti će biti objavljen na službenim oglasnim pločama Bosansko-podrinjskog kantona Goražde i sredstvima javnog informisanja, a sve u cilju zadovoljenja načela javnosti i transparentnosti dodjele sredstava, a potencijalni korisnici sredstava će u roku objavljenom javnom pozivu moći aplicirati za dodjelu sredstava.

Za provođenje javnog poziva formiraće se komisija za dodjelu sredstava koju će činiti lica sa odgovarajućom stručnom spremom, ekonomske, tehničke ili pravne struke, a Komisiju će svojim aktom formirati Ministarstvo za privredu Bosansko-podrinjskog kantona Goražde uz saglasnost Vlade Bosansko-podrinjskog kantona Goražde koja će brojati 5 (pet) članova.

Član 6.

Komisija iz člana 5. ovog Pravilnika će raditi u skladu sa Programom, ovim Pravilnikom i Javnim pozivom a odluka komisije će se donositi na sjednicama komisije koncenzusom ili većinom glasova svih prisutnih članova komisije. Komisija ima ovlaštenje da u slučaju nejasnoća iz dostavljene aplikacione dokumentacije, zatraži određena pojašnjenja od strane ovlaštenih osoba obrtnika i udruženja, a ista nema pravo sugerisati ili samovoljno vršiti bilo kakve izmjene ili druge tehničke ispravke u dostavljenoj dokumentaciji.

U aktu formiranja komisije odrediće se predsjednik Komisije i tehnički sekretar Komisije. O svom radu Komisija je dužna da vodi zapisnik i da na kraju svog zadatka sačini izvještaj o radu. Tačni zadaci, rok izvršenja zadatka, kao i ostale pojedinosti u radu komisije odrediće se u aktu o formiranju komisije.

Član 7.

Za provođenje programa kao i za ostale aktivnosti na realizaciji istog biće zadužena radna tijela, odnosno komisije, Ministarstva za privredu, Ministarstva za finansije i Vlade Bosansko-podrinjskog kantona Goražde, svako iz svoje nadležnosti.

Član 8.

Konačne odluke oko raspodjele odnosno dodjele svih sredstava donosiće Vlada Bosansko-podrinjskog kantona Goražde na prijedlog resornog Ministarstva odnosno radnih tijela i Komisija.

Član 9.

Kontrolu namjenskog utroška dobivenih sredstava po ovom programu vršiće Komisija koju će formirati Ministarstvo za privredu uz saglasnost Vlade Bosansko-podrinjskog kantona Goražde. Komisija je dužna sačiniti Izvještaj o izvršenoj kontroli i putem Ministarstva za privredu je dužna dostaviti ga Vladi Bosansko-podrinjskog kantona Goražde na usvajanje.

Član 10.

Ovaj pravilnik stupa na snagu danom stupanja odnosno donošenja Programa utroška sredstava „Transferi za podsticaj razvoja, poduzetništva i obrta“ za 2009.godinu i isti je njegov sastavni dio, te će se objaviti zajedno sa programom .

MINISTAR

Mustafa Kurtović prof.

Broj: 04- 14-1153-3/09
Goražde, 06.05.2009.godine